



Fwen Haenh Aendangj Raeuz

赞 共 产 党 歌

□ Veiz Couyiz / 韦怡怡

Ngoenzneix ngoenzseng dangj,
Lwgminz angq raixcaix,
Raeuz geij boux hwnjdaiz,
Simhai lumj vavengj.

Gij laeb dangj bonjeiq,
Ciengzseiz aeu cingcuj,
Yaek siumied dicuj,
Gujli raeuz fanndang.

Caez laebbaenz seizhaenx,
Cungj haenqrengz bae ngeix,
Fazcanj daengz ngoenzneix,
Feiq haujlai goengfou.

Boksok caeuq apbik,
Dik dwk bouxhoj haemz,
Deng apbik deng daenz,
Lajbiengz cungj miz nanh.

Gaxgonq raeuz beksingq,
Mbouj dwg mingh ndwi baenz,
Vih sevei mbouj haenq,
Lwgminz raen dwgrengz.

Seng youq sevei gaeuq,

Nyapnyuk aeuq ciuhvunz,
Vihliux geij donq gwn,
Ngoenz lienz hwnz bae guh.

Gaxgonq sevei gaeuq,
Hawj ukgyaeuq dwgrengz,
Vihliux donq gyu seng,
Deng haenqrengz baenz ciuh.

Youq seiqgyaiq lajmbwn,
Vihliux gwn dem daenj,
Dai mbouj miz dieg baengh,
Ndoet raemx hix mbouj roengz.

Dwgrengz gaej ienq boh,
Gungzhoj gaej ienq mbwn,
Haenqrengz cij miz gwn,
Hwnz ngoenz raeuz baegnaet.

Gaxgonq raeuz Cunghgoz,
Cingq dwg hoj dahraix,
Gwnz biengz gyoengqvunz lai,
Wnggai aeu geiqmaenh.

Mbangj vunz dai gwnz loh,
Miz di noh rim ranz,

Bouxhoj gag simfanz,
Ranz fouqmiz mbouj you.

Gij seiqgyaiq seizhaenx,
Saedcaih maenh mbouj roengz,
Gungcanjdangj miz goeng,
Ciuq doengxngoenz guhcingq.

Gungcanjdangj lingjdauj,
Gauj sevei cujyi,
Gij doeklaeng muzdiz,
Miz raeuz bae saedyienh.

Dwen daengz gungcanjdangj,
Gangj aencingz mbouj liux,
Lwgminz raeuz daeuj diuq,
Mbouj ndaej siuj bouxlawz.

Laebbaenz gungcanjdangj,
Guekgya gangj cwngci,
Saenqhwnq gij ginghci,
Laebndei cidu raeuz.

Daih 'it aen bak bi,
Muzbyauh cix saedyienh,
Lwgminz sim doxlien,

Guekgya bienq gyaunde.

Daihngaih aen bak bi,
Mingzbeig gij gveihva,
Caez haeujsim daeuj va,
Gingj da yawj engq gyaeu.

Daihsam aen bak bi,
Saedyienh hix ndaej dingh,
Dangjcunghyangh gaem bingq,
Itdingh ndaej saedyienh.

Gaenriengz Dangjcunghyangh,
Gvaq siujgangh swnghhoz,
Ngoenzcog raeuz Cunghgoz,
Lohloh cungj raen ndei.

Byaij diuz loh daegsaek,
Haet beij haet fouqgiengz,
Yendaiva miz yiengh,
Vunzbiengz couh angqyangz.



Diegcuengh Dangq Biengzsien

壮 乡 美 好 如 仙 境

□ Se Ginhlungz / 谢金龙

Goengqgoengq bya cangqcwt,
Heuswd bi daengz byai,
Fwjhau gyonj baenz baiz,
Ndiep yaek dai yaek lix.

Diuzdiuz dah raemx saw,
Seiqcawz laecumcum,
Haethaemh mok gyuemuemx,
Lumj fuk veh maezvunz.

Lajmbwn dieg gvangqlangh,
Angj mbouj gvaq dieg raeuz,
Bya gyaeu raemx hix gyaeu,

Mbouj dwg raeuz gag haenh.
Vunz ndaem naz ndai naz,
Gouz ra gwn caux daenj,
Ngoenzngoenz ndaw doengh nyaengq,
Guhhong gaenx dangqmaz.

Yiengzdohi langh lajfaex,
Maxdaemq daeh huqbya,
Ndaem miz duh miz gva,
Ciengx miz bya miz gungq.

Ndwen sam valeux nding,

Hoengh hai rim Diegcuengh,
Gyoengq beixbeix nuengxnuengx,
Ndae cuengq sing guhfwen.

Lwgsau lengjlili,
Riufifi baenzlai,
Lwgmbauq bouxboux gvai,
Miz dungxcaiz rimrwd.

Mbanjmbanj guh ndaej gwn,
Gizgiz vunz maengxangq,
Gyolaih gungcanjdangj,
Diegcuengh dangq biengzsien.

Hoenz Dungzguj

铜 鼓 魂

□ Lij Swngcwngz / 李盛成

Bihaenx Yizbwnj gung Namzningz,
Bouxak laemxsim hen guekcoj,
Cap Ndoidungzguj daeuj saek loh,
Dingh caeuq fangzraq doxbuek dai.
当年铜鼓起狼烟,抗日英雄斗志坚,
洒血捐躯惟恐后,杀敌灭寇奋争先。

Doenghbaez gizneix dieg hoenxcienq,
Seizneix cix bienq baenz hagdangz,
Laj geiz hajsingh nyez angqyangz,
Fukhwng mbouj dwg fangzhwnzloq.
峥嵘岁月成追忆,古老沙场变校园,
笑看红旗飘起舞,中华复兴梦能圆。

Daxmeh de daejww, baenzlawz
hix mbouj hawj de okbae, song fwngz
buekmingh got dawz de, ca mbouj
geijlai yaek gvih roengzdaej gouz de
lo.

Gij saeh sim'in cib lai bi
gaxgonq couh lumj youq dangqnaj,
caeggeq ciengj bouxgvn de bae, hawj
de bienqbaenz yahmai, de soujmai
baenzlai bi ciengx daeglwg, seizneix
da raen daeglwg gaenq majhung
baenzvunz, baenzlawz cuengqsim hawj
daeglwg okbae mauhyiemj ne?

Lungz Byauh mbouj miz banhfap,
cij ndaej dapwngq daxmeh de mbouj
okbae, daxmeh de lij mbouj cuengq-
sim, itdingh aeu rag dawz fwngz de,
hawj de naengh youq henz congz
buenx, mbouj ndaej byaij yamq ndeu.

•Sawcuenhvaez Lwgnyez•

Gij Golwgnyez Henz Dahhoengz

红 水 谣

□ Lanz Haijyangz Moz Beibei / 蓝海洋 莫蓓蓓

Lungz Byauh dinghdingh naengh
youq henz congz, caenhringz caem-
dingh roengzdaej, nyengrwz dingq gij
sing baihgrog.

Gyanghwnz engq caem lo,
baihgrog cawz le gij sing mbawfaex
deng rumz raq doek raq ci ndaej
yiengjsasa, maz doenghdanh hix

mbouj miz lo. Haxbaenh lij miz duzma
dingzdingz duenhduenh raeuq caenh
he, seizneix cij lw duzbid youq
gokciengz heuhcici.

“Aiq mbouj dwg sing dwkcungq
ba?” Gvaq le haujlai nanz, daxmeh de
guj naeuz, “duzyou baujyouh, mbouj
dwg caeggeq cij ndei!”

“Aiq dwg raeuz dingq loek lo.”
Lungz Byauh hix buenq saenq buenq
ngeiz naeuz, “meh, mwngz laep da
ninz ba.”

“Yawj conghcueng dingjranz
mbwn ronghyaiyai, aiq hix yaek rongh
lo, gou baenzlawz ninz ndaej ndaek?”
(caengz sat)